

摘藻堂四庫全書薈要

集部

欽定四庫全書薈要

集部

宋詩鈔卷十三

四

詳校官候選知縣臣吳圃華



欽定四庫全書薈要卷二萬二百六十六

集部

宋詩鈔卷十三

內閣中書舍人吳之振編

林逋和靖詩鈔

逋字君復杭之錢塘人少孤力學刻志不仕結廬

西湖孤山真宗聞其名賜粟帛詔長吏歲時勞問臨終詩有茂陵他日求遺稿猶喜曾無封禪書時人高其志識賜謚和靖先生逋不娶無子所居多植梅畜

鶴泛舟湖中客至則放鶴致之因謂梅妻鶴子云其  
詩平淡邃美而趣向博遠故辭主靜正而不露刺譏  
梅聖俞謂詠之令人忘百事大數塞王孟之幽而攄  
劉韋之逸歐陽文忠愛其詠梅花詩疎影橫斜一聯  
謂前世未有此句黃涪翁則以雪後園林二語為勝  
之蓋一取神韻一取意趣皆為傑句然知歐陽之所  
賞者多知涪翁之所賞者少也所作雖夥未嘗留稿  
或問之曰吾不欲取名于時况後世乎故所存百無

一二如當時稱其五言有草泥行郭索雲木叫鉤輶  
句集中已不可得其他遺軼可知也

送牛秀才之山陽省兄

之子詠陟岡別我歲時晏後夜失羣鶴高天着行鴈楚  
山遠近出江樹青紅間尊酒無足辭離愁滿行盼

和運使陳學士遊靈隱寺寓懷

山壑氣相合旦暮生秋陰松門韻虛籟錚若鳴瑤琴舉  
目羣狀動傾耳百慮沉按部既優游時此振衣襟泓澄

冷泉色寫我清曠心飄飄白猿聲答我雅正吟經臺復  
丹井捫蘿嘗徧臨鶴蓋青霞映玉趾蒼苔侵溫顏煦槁  
木真性馴幽禽所以仁惠政及物一一深洒翰璘珣壁  
返駕旃檀林回睨宰諸峯天半千萬尋

上湖閒泛艤舟石函因過下湖小墅

平皋望不極雲樹遠依依及向扁舟泊還尋下瀨歸青  
山連石埭春水入柴扉多謝提壺鳥留人到落暉

西湖舟中值雪

浩蕩彌空濶霏霏接水濱  
舟移忽自却山近未全分  
凍軫閒清泛溫鑪擁薄薰  
悠然詠招隱何許款離羣

湖村晚興

滄洲白鳥飛山影落晴暉  
映竹犬初吠弄船人各歸  
水波隨月動林翠帶煙微  
寺近疎鐘起蕭然還掩扉

湖山小隱

猿鳥分清絕林蘿擁翠微  
步穿僧徑出肩搭道衣歸  
水墅香菰熟煙崖早笋肥  
功名無一點何要更忘機

園井夾蕭森紅芳墮翠陰  
晝巖松鼠靜春塹竹鷄深  
歲課非無术家藏獨有琴  
顏原遺事在千古壯閒心  
衡門鄰晚島環堵背寒岡  
片月通蘿徑幽雲在石牀  
客遊拋鄆杜漁事擬滄浪  
管樂非吾尚昂頭有自方

小隱自題

竹樹遶吾廬清深趣有餘  
鶴閒臨水久蜂懶得花疎  
酒病妨開卷春陰入荷鋤  
嘗憐古圖畫多半寫樵漁

北山寫望

晚來山北景圖畫亦應非村路飄黃葉人家濕翠微樵  
當雲外見僧向水邊歸一曲誰橫笛蒹葭白鳥飛

中峰

中峰一徑分盤折上幽雲夕照前村見秋濤隔嶺聞長  
松含古翠裊藥動微薰自愛蘇門嘯懷賢思不羣

小圃春日

岸幘倚微風柴籬春色中草長團粉蝶林暖墜青蟲載  
酒為誰子移花獨乃翁於陵偕隱事清尚未相同

郊園避暑

柴門鮮人事氛垢頗相忘  
愛彼林間靜復茲池上涼  
託心時散帙遲客復攜觴  
況有陶籬趣歸禽語夕陽

園廬秋夕

蘭社裊裊香開扉趣自長  
寒煙宿墟落清月上林塘  
意想殊為適形骸固可忘  
援琴有餘興聊復寄吟觴

山村冬暮

衡茅林麓下春色已微茫  
雪竹低寒翠風梅落晚香  
樵

期多獨往茶事不全忙  
雙鷺有時起橫飛過野塘

山中冬日

殘雪照籬落空山無俗喧  
鷄寒懶下樹人晏獨開門  
廢圃春榮動回塘霧氣昏  
誰家歲酒熟輟棹憶西村

旅館寫懷

垂成歸不得危坐對滄浪  
病葉驚秋色殘蟬怕夕陽  
可堪疎舊計無復更剛腸  
的的孤峰意深宵一夢狂

出曹州

詩懷動歎嗟驢立帽陰斜雨灤生新釀茅鼓夾舊槎午  
煙昏獨店岡路透誰家幾日江南興扁舟泊岸沙

盱眙山寺

下傍盱眙縣山崖露寺門疎鐘過淮口一徑入雲根竹  
老生虛籟池清見古源高僧拂經榻茶話到黃昏

留題李頡林亭

無琴枕鶴經盡日卧林亭啼鳥自相語幽人誰欲聽半  
闌花籜白一徑草盤青何必對樽酒此中堪獨醒

翠微亭

在金陵  
清涼寺

亭在江干寺清涼更翠微  
秋階響松子雨壁上苔衣絕  
境長難得浮生不擬歸  
旅懷何計是西庵入斜暉

臺城寺水亭

金井前朝事林僧問不知綠苔欺破閣  
白鳥占閒池清楚曾經晉荒唐直到隋  
南廊一聲磬斜照獨凝思

淮甸南遊

幾許搖鞭興淮天晚景中  
樹林兼雨黑草實着霜紅  
膽

氣誰憐俠衣裝自笑我寒威敢相掉獵獵酒旗風

聞葉初秀才東歸

高鴻多北向極目雨餘天春滿吳山樹人登汴水船吟  
生千里月醉盡一囊錢官便懷鄉邑時清復少年

病中謝馮彭年見訪

老去已多病况當梅雨時山空門自掩晝永枕頻移晚  
燕巢猶濕新篁籜未披若非求仲至誰復問棲遲

將歸四明夜坐話別任君

酒酣相向坐別淚濕吟衣半夜月欲落千山人憶歸亂  
塵終古在長瀑倚空飛明日重攜手前期易得違

和梅聖俞雪中同虛白上人見訪

湖上玩佳雪相將惟道林早煙村意遠春漲岸痕深地  
僻過三徑人閒試五禽歸撓有餘興寧復比山陰

和酬杜從事題壁

弭蓋入衡宇相看情獨深蕭疎秋樹色老大故人心佳  
話頻移晷清標幾拂襟寥然長卿壁題此比兼金

夏日寺居和酬葉次公

午日猛如焚清涼愛寺軒鶴毛橫蘚陣蟻穴入莎根社  
信題茶角樓衣笕酒痕中餐不勞問筍菊淨盤樽

送長吉上人

囊集暮雲篇行行肯廢禪青山買未暇朱闕去隨緣茗  
試幽人井香焚賈客船淮流遲新月吟玩想忘眠

春日送袁成進士北歸

春潮上海門歸鴈遠行分千里倦行客片帆還送君酒

波欺碧草歌疊裏晴雲來歲東堂桂聊酬一戰勳

送史殿省典封州

馬援疏蠻邑銅標何可窮人煙時亦有海色自如空  
髭髮梅分白旌旗瘴減紅惟應時藥罷理照酒醪中

送王舍人罷兩浙憲赴闕

上問還旌節明廷覲冕旒清談傾綺席蠹簡壓歸舟  
越俗今無訟閒田亦有秋公朝論爵賞當拜富民侯

送昱師赴請姑蘇

同載闔閭人衣囊覆氎巾新煙赤岸暝融雪太湖春鐘  
遠移齋候香遲上定身當知舉如意寶地雨花頻

送皎師歸越

林間久離索忽忽望西陵靜戶初聞扣歸舟又說登野  
煙含樹色春浪疊沙稜幸謝雲門路同尋苦未能

送越倅楊屯田赴闕

越中分治罷山水別來初詩景多留石船痕半載書野  
程江樹遠公燕邵樓虛看塞嚴徐召清風滿直廬

送思齊上人之宣城

林嶺藹春暉  
程程入翠微  
泉聲落坐石  
花氣上行衣  
詩正情懷澹  
禪高語論稀  
蕭閒水西寺  
駐錫莫忘歸

洞霄宮

大滌山相向  
華陽路暗通  
風霜唐碣久  
草木漢祠空  
劒石苔花碧  
丹池水氣紅  
幽人天柱側  
茅屋灑松風

寄思齊上人

松下中峰路  
懷師日日行  
靜鐘浮野水  
深寺隔春城  
閣

掩茶煙晚廊迴雪溜清當期相就宿詩外話無生

寄吳肅秀才

時吳在天  
王院夏課

肄業寄僧房暑天湖上涼竹風過枕簟梅雨潤巾箱引  
步青山影供吟白鳥行明年重訪舊身帶桂枝香

寄清曉閣黎

前時春雪晴林壑趣彌清幾憶山陰講兼忘谷口耕樹  
叢歸夕烏湖影浸寒城還肯重相訪柴門掩杜蘅

寄孫仲簿公

低折滄洲簿無書整兩春馬從同事借妻怕罷官貧道  
僻收閒藥詩高笑古人仍聞長吏奏表乞瑣廳頻

寄和昌符

家近太行居西歸歷一驢同儕多及第高論獨知書名  
迹收藏徧公門請謁疎離愁不可寫蟬噪夕陽初

淮甸城居寄任刺史

擾擾非吾事深居斷俗情石莎無雨瘦秋竹共蟬清劒  
在慵閒拂詩難憶細評寥然獨楮枕淮月上山城

寄輦下傳神法相大師

禁寺諸供奉如師藝學稀粉輕昏古本羅重拆秋衣淨  
嫌生瓶暈連陰長竹圍算應支遁馬毛骨苦無肥

寄臨川司理趙時校書

遠宦風波隔歸期歲月頻天形孤鳥晚煙色大江春驛  
路向江郭船檣留賈人高臺望不極空使髣華新

贈崔少微

賢才負聖朝終日掩衡茅尚靜師高道甘貧絕俗交  
曉

碑看壁蠹蒸木拾鄰梢却憶楊夫子勞勞事解嘲

贈胡介

妻兒終擬棄舊識盡名賢高節嫌超世常流笑學仙金  
方燒易得星度算來玄祗說尋山去相期已數年

宿洞霄宮

秋山不可畫秋思亦無垠碧澗流紅葉青林點白雲涼  
陰一鳥下落日亂蟬分此夜芭蕉雨何人枕上聞

湖山小隱二首

道着權門便絕交一峰青翠濕衡茅莊生已憤鴟鵂嚇  
揚子休譏螻蛄嘲滴滴藥泉來石竇霏霏茶靄出松梢  
琴僧近借南薰譜且併閒工子細抄

閒搭綸巾擁縹囊此心隨分識興亡黑頭為相雖無謂  
白眼看人亦未妨雲噴石花生劒壁雨敲松子落琴牀  
清猿幽鳥遙相叫數筆湖山又夕陽

### 湖上晚歸

卧枕船舷歸思清望中渾恐是蓬瀛橋橫水木已秋色

寺倚雲峰正晚晴翠羽濕飛如見避紅蕖香嬾似相迎  
依稀漸近誅茅地鷄犬林蘿隱隱聲

湖上初春偶作

梅花開盡臘亦盡晴暖便如寒食天春色半歸湖岸柳  
人家多上郭門船文禽相並映短草翠潏欲生浮嫩煙  
幾處酒旗山影下細風時已弄繁絃

西湖春日

爭得才如杜牧之試來湖上輒題詩春煙寺院敲茶鼓

夕照樓臺卓酒旗濃吐襟芳薰巖岬濕飛雙翠破連漪  
人間幸有蓑兼笠且上漁舟作釣師

池上春日

一池春水綠於苔水上花枝竹間開芳草得時依舊長  
文禽無事等閒來年顏近老空多感風雅含情苦不才  
獨有浴沂遺想在使人終日此徘徊

西巖夏日

蕙帳蕭閒掩敝廬子真巖石坐來初為驚野鳥巢間乳

懶過隣僧竹裏居  
新溜迸涼侵靜語  
晚雲浮潤上殘書  
何煩彊捉白團扇  
一柄青松自有餘

夏日即事

石枕涼生菌閣虛  
已應梅潤入圖書  
不辭齒髮多衰病  
所喜林泉有隱居  
粉竹亞梢垂薄露  
翠荷差影聚遊魚  
北窗人在羲皇上  
時為淵明一起予

隱居秋日

行藥歸來即杜門  
嘯臺秋色背人羣  
幽蟲傍草晚相映

遠水着煙寒未分高亢可能稱獨行窮空猶擬賴斯文  
過從好事今誰是自笑何如楊子雲

秋日湖西晚歸舟中書事

水痕秋落蟹螯肥閒過黃公酒舍歸魚覺船行沉草岸  
犬聞人語出柴扉蒼山半帶寒雲重丹葉疎分夕照微  
却憶清溪謝太傅當時未解惜蓑衣

深居雜興六首

諸葛孔明謝安石畜經濟之才雖結廬南陽攜妓東

山未嘗不以平一字內躋致生民為意鄙夫則不然  
胸腹空洞剪然無所存置但能行樵坐釣外寄心於  
小律詩時或鏖兵景物衡門情味則倒覘二君而反  
有得色凡所寓興輒成短篇總曰深居雜興詩六首  
蓋所以狀林麓之幽勝攄几格之閒曠且非敢求聲  
於當世故援筆以顯其事云

隱居松籟細錚然何獨微之重碧鮮已被遠峯擎巘巘  
更禁初月吐娟娟門庭靜極霖苔露籬援涼生裊菊煙

中有病夫披白袷瘦行清坐詠遺篇

四壁垣衣釣具腥已甘衡泌號沉冥伶倫近日無侯白  
奴僕當時有衛青花月病懷看酒譜雲蘿幽信寄茶經  
茅君使者蕭閒甚獨理叢毛向戶庭

薄夫何苦事姦姦一室琴書自解顏峰後月明秋嘯去  
水邊林影晚樵還文章敢道長於古光景渾疑剩却閒  
多少煙霞好猿鳥令人惆悵謝東山

冉冉秋雲抱嘯臺一丘松竹是閒媒誰聞濟北傳兵略

枉說山東出相才樵褐短長披搯膝丹爐高下疊懸胎  
三千功行無圭角可望虛皇九錫來

上書可有三千牘下筆曾無一百函閒卷孤懷背塵世  
獨營幽事傍雲巖僧分乳食來陰洞鶴觸茶薪落蠹杉  
未似周顒少貞勝北山應免略相銜

松竹封侯尚未尊石為公輔亦云云清華自合論閒客  
玄墨何妨事靜君鶴料免慚尸厚祿茶功兼擬策元勳  
幽人不作山中相且擁圖書卧白雲

雜興四首

短褐蕭蕭頂幅巾  
擁書纔罷即嚙呻  
耕樵可似居山者  
飲饌長如病酒人  
閉戶不無慵答客  
焚香除是靜朝真  
前賢風槩聊希擬  
一刺偏多并大春

散帙揮毫總不忤  
病懷愁緒坐相兼  
苔痕作意生秋壁  
樹影無端上古簾  
一壑等閒甘汨汨  
五門平昔避炎炎  
惟應數刻清涼夢  
時曲顏肱興未厭

湖上山林畫不如  
霜天時候屬園廬  
梯斜晚樹收红柿

筒直寒流得白魚石上琴尊苔野淨籬陰鷄犬竹叢疎  
一關兼是和雲掩敢道門無卿相車

掉臂何妨入隱淪高賢應總貴全真次山有以稱聲叟  
魯望兼之傳散人拂水遠天孤榜晚夾村微雨一溪春  
不知圖畫誰名手狀取江湖太古民

孤山後寫望

水墨屏風狀總非作詩除是謝玄暉溪橋裊裊穿黃落  
樵斧丁丁斫翠微返照未沉僧獨往長煙如淡鳥橫飛

南峰有客鋤園罷閒倚籬門忘却歸

孤山寺端上人房寫望

底處憑闌思眇然孤山塔後閣西偏陰沉畫軸林間寺  
零落碁枰封上田秋景有時飛獨鳥夕陽無事起寒烟  
遲留更愛吾廬近祇待重來看雪天

孤山寺

雲峰水樹南朝寺祇隔叢篁作並鄰破殿靜披蘂白古  
齋房閒試酪奴春白公睡閣幽如畫張祜詩牌妙入神

乘興醉來拖木屐  
翠苔蒼蘚石磷磷

西湖

混沌神巧本無形  
匠出西湖作畫屏  
春水淨如僧眼碧  
晚山濃似佛頭青  
樂蘆粉堵搖魚影  
蘭杜煙叢閣鷺翎  
往往鳴榔與橫笛  
細風斜雨不堪聽

平居遣興

有甚餘閒得解嘲  
高慵時把几檠敲  
早致晚鳥沉幽語  
歷剌煙篁露病梢  
草野交遊披褐見  
神仙書史點朱抄

皇朝不是甘逃遁爭奈心嘉許與巢

池陽山居

數家村店簇山旁下馬危橋已夕陽驚鳥忽衝谿靄破  
暗花閒墮塹風香時間盤泊心猶戀日後尋思興必狂  
可惜迴頭一聲笛酒旗斜曳出疎篁

易從上人山亭

湖上汪灣隔數峰籬門和竹夾西東閒來此地行無厭  
又共吾廬看不同靈隱路歸秋色裏招賢庵在鳥行中

屏風若欲相攬見合把巉巖與畫工

過蕪城縣

詩中長愛杜池州說着蕪城是勝遊  
山掩縣城當北起渡衝官道向西流  
風稍檣碇網初下雨擺魚薪市未收  
更好兩三僧院舍松衣石髮鬪山幽

無為軍

掩映軍城隔水鄉人煙景物共蒼蒼  
酒家樓閣搖風旆茶客舟船簇雨檣  
殘笛遠砧聞野墅老苔寒檜看僧房

狎鷗更有江湖興珍重江頭白一行

耿濟口舟行

環迴幾合似江干刺眼詩幽盡狀難沙觜半平春晚濕  
水痕無底照秋寬老霜蒲葦交千刃怕雨鳬鷗著一攢  
擬就孤峰寄簑笠舊鄉漁業久凋殘

園廬

柴關寒井對蕭晨自愛棲遲近古人閒草徧庭終勝俗  
好書堆案轉甘貧橋邊野水通漁路籬外青山見寺鄰

懶為躬耕詠梁甫吾生已是太平民

春陰

似雨非晴意思深宿醒牽引卧春陰苦憐燕子寒相並  
生怕梨花晚不禁薄薄簾幃欺欲透遙遙歌管壓來沉  
北園南陌狂無數只有芳菲會此心

山園小梅二首

衆芳搖落獨暄妍占盡風情向小園疎影橫斜水清淺  
暗香浮動月黃昏霜禽欲下先偷眼粉蝶如知合斷魂

幸有微吟可相狎不須檀板共金尊

剪綃零碎點酥乾向背稀稠畫亦難日薄縱甘春至晚  
霜深應怯夜來寒澄鮮祇共鄰僧惜冷落猶嫌俗客看  
憶着江南舊行路酒旗斜拂墮吟鞍

又詠小梅

數年閒作園林主未有新詩到小梅摘索又開三兩朶  
團欒空遠百千迴荒隣獨映山初盡晚景相禁雪欲來  
寄語清香少愁結為君吟罷一銜杯

梅花

吟懷長恨負芳時為見梅花輒入詩  
雪後園林纔半樹水邊籬落忽橫枝  
人憐紅艷多應俗天與清香似有私  
堪笑胡兒亦風味解將聲調角中吹

小園煙景正淒迷陣陣寒香壓麝臍  
湖水倒窺疎影動屋簷斜入一枝低  
畫名空向閒時看詩客休徵故事題  
慚愧黃鸝與蝴蝶祇知春色在桃溪

杏花

蓓蕾枝梢血點乾，粉紅腮頰露春寒。  
不禁煙雨輕歌着，祇好庭臺愛惜看。  
隈柳傍桃斜欲墜，等鶯期蝶猛成團。  
京師巷陌新晴後，賣得風流更一般。

贈胡明府

一琴牢落倚松窗，孤澹無君得趣長。  
謁廟有時封縣版，坐衙終日着公裳。  
為收牌印教村僕，偶檢圖書見古方。  
徵足稅錢人更靜，卻搢吟策立秋廊。

寄傅霖

葛蔓煙枯束六經高廉渾與昔賢停黃牙稚子跨牛種  
白眼山人識劒形寒睡草旁林酒壯曉思河曲雨槎腥  
傳聞曾說生平事不要清朝夢武丁

寄太白李山人

顏如童子髮如鬣卜築深當太白西身上祇衣麤直裰  
馬前長帶古偏提鷗鵬懶擊三千水龍虎閒封六一泥  
幾度枕肱人迹外半窗松雪論天倪

春日寄錢都使

桃花枝重肉紅垂  
萱草抽苗抹綠肥  
正語暖鶯風細細  
着雙寒燕雨稀稀  
亭臺物景兼飄絮  
宅院時情漸夾衣  
拍背挾肩行樂事  
不甘離索向芳菲

寄題歷陽馬仲文水軒

搆得幽居近郭西  
水軒風景獨難齊  
煙含晚樹人家遠  
雨濕春蒲燕子低  
紅燭酒醒多聚會  
粉牋詩敵幾招携  
旅遊今日堪搔首  
搖落山城困馬蹄

春暮寄懷曹南通守任寺丞

中行

跌蕩情懷每事同十年曹社醉春風彈弓園圃陰森下  
碁子廳堂寂靜中赤脚我猶無一婢黑頭君合作三公  
江湖今日還勞結目送歸飛點點鴻

復賡前韻且以陋居幽勝詫而誘之

畫共藥材懸屋壁琴兼茶具入船扉秋花浥露明紅粉  
水鳥衝煙濕翠衣石磴背穿林寺近竹煙橫點海山微  
百千幽勝無人見說向吾師是洩機

孤山隱居書壁

山水未深猿鳥少此生猶擬別移居  
直過天竺溪流上  
獨樹為橋小結廬

池上作

簇簇菰蒲映蓼花  
水痕天影蘸秋霞  
分明似箇屏風上  
飛起鵝鵲一道斜

竹林

寺籬斜夾千梢翠  
山磴深穿萬籐乾  
却憶貴家廳館裏  
粉牆時畫數莖看

詩田

淤泥肥黑稻秧青  
濶蓋深流旋旋生  
擬倩湖君書版籍  
水仙今佃老農耕

易從師山亭

林表秋山白鳥飛  
此中幽致亦還稀  
西村渡口人煙晚  
坐見漁舟兩兩歸

秋江寫望

蒼茫沙嘴鷺鷥眠  
片水無痕浸碧天  
最愛蘆花經雨後

一蓬煙火飯漁船

乘公橋作

晚峰橫碧樹梢紅  
數榜漁罾水影中  
憶得江南曾看處

巨然名畫在屏風

巨然僧尤妙山水

初夏

乳雀啁啾日氣濃  
稚桑交影綠重重  
秧田百畝鵝黃犬  
橫策溪村屬老農

秋日含山道中廻寄歷陽皓然山人

村落人家摠入詩下驢盤薄立多時霜泉一掬清於鑑  
漱着牙根便憶歸

送易從師還金華

吟卷田衣歲向殘孤舟夜泊大江寒前巖數本長松色  
及早歸來帶雪看

自作壽堂因書一絕以誌之

湖上青山對結廬墳前脩竹亦蕭疎茂陵他日求遺稿  
猶喜曾無封禪書

春日懷歷陽後園遊兼寄宣城天使

昔年行樂伴王孫事盡清狂是後園一榻竹風橫懶架  
半軒花月倒頑盆佳人暗引鶯言語芳草閒迷蝶夢魂  
今日淒涼舊春色可堪煙雨近黃昏

宋詩鈔卷十三

欽定四庫全書薈要卷二萬二百六十七

集部

宋詩鈔卷十四

內閣中書舍人吳之振編

石介徂徠詩鈔

介字守道兗州奉符人年二十六舉進士甲科為  
鄆州觀察推官歷官至國子監直講慶厯中進用韓  
范富杜諸臣介躍然喜曰此盛事也雅頌吾職其可  
已乎乃作慶厯聖德詩直指大臣分別邪正詩出泰

山孫明復曰子禍始于此矣以是為人所擠杜祁公  
韓魏公俱薦之拜太子中允直集賢院尋卒于家怒  
之者謂其詐死北走契丹請斲棺驗之幸不許所為  
詩文皆根柢至道排斥佛老及姦臣宦女庶幾聖人  
之徒魯人稱為徂徠先生因以名其集永叔詩云問  
胡所專心仁義丘與軻揚雄韓愈氏此外豈知他尤  
勇攻佛老奮筆如揮戈又云金可爍而銷玉可碎非  
堅不若書以紙六經皆紙傳但當書百本傳百以為

千或落于四夷或藏在深山待彼謫焰熄放此光芒  
懸今讀其詩嶙峋砢砢挺立千尋溫厚之意存于激  
直得見風人之遺然正學忤時直道致黜千古一轍  
其可哀也

慶厯聖德頌

三月二十一日大昕皇帝御紫宸殿朝百官相得象  
殊拜竦樞密使夷簡以司徒歸第二十二日制命昌  
朝參知政事弼樞密副使二十六日勅除脩靖素並

充諫官四月八日皇帝御紫宸殿朝百官衍樞密使  
仲淹琦樞密副使乃用御史中丞拱宸御史邀御史  
平諫官脩靖十一疏追竦樞密使勅十三日勅又除  
襄為諫官天地人神昆蟲草木無不歡喜皇帝退姦  
進賢發於至聰動於至誠奮於睿斷見於剛克陟黜  
之明賞罰之公也上視漢魏隋唐五代凡千五百年  
其間非無聖神之主盛明之時未有如此選人之精  
得人之多進人之速用人之盡實為希濶殊尤曠絕

盛事在皇帝之德之功為卓犖瑰偉神明魁大古者  
一雲氣之祥一草木之異一蹄角之怪一羽毛之瑞  
當時羣臣猶且濃墨大字金頭鈿軸以稱述頌美時  
君功德以為無前之休丕天之績如仲淹弼實為不  
世出之賢求之於古堯則夔龍舜則稷契周則闕散  
漢則蕭曹唐則房魏陛下有之諸臣亦皆今天下之  
人望為宰相諫官者陛下盡用之此比雲氣草木蹄  
角羽毛之異萬萬不侔豈可翻無歌詩雅頌以播我

君之休聲烈光神功德刻于琬琰流于金石告于  
天地奏于宗廟存于萬千年而無窮盡哉臣實羞之  
臣嘗愛慕唐大儒韓愈為博士日作元和聖德頌千  
二百言使憲宗功德赫奕煒燁昭于千古至今觀之  
如在當日陛下今日功德無讓憲宗臣文學雖不逮  
韓愈而亦官於太學領博士職歌詩讚頌乃其職業  
竊擬於愈輒作慶厯聖德頌一首四言凡九百六十  
字文辭鄙俚固不足以發揚臣子之心亦欲使陛下

功德煒燁昭于千古萬千年後觀之如在今日也臣  
不勝死罪臣賤無路以進姑藏諸家以待樂府之採  
焉

於維慶厯三年三月皇帝龍興徐出闈闥晨坐太極晝  
開闔闔躬攬賢英手鋤姦桀大聲颯颯震搖六合如乾  
之動如雷之發昆蟲踣躅妖怪藏滅同明道初天地嘉  
吉初聞皇帝蹙然言曰予父予祖付予大業予恐失墜  
實賴輔弼汝得象殊重慎微密君相予久予嘉君伐君

仍相予筮鏞斯協昌朝儒者學問該洽與予論政傳以  
經術汝貳二相庶績咸秩惟汝仲淹汝誠予察太后乘  
勢湯沸大熱汝時小臣危言業業為予司諫正予門闥  
為予京兆聖予讒說賊叛于夏往予式遏六月酷日大  
冬積雪汝暑汝寒同於士卒予聞辛酸汝不告乏予晚  
得弼予心弼悅弼每見予無有私謁以道輔予弼言深  
切予不堯舜弼自答罰諫官一年奏疏滿篋侍從週歲  
忠力盡竭契丹亡義檇机饕餮敢侮大國其辭慢悖弼

將予命不畏而懾卒復舊好民得食褐沙磧萬里死生  
一節視弼之膚霜剝風裂觀弼之心鍊金鍛鐵寵名大  
官以酬勞渴弼辭不受其志莫奪惟仲淹弼一夔一契  
天實賚予予其敢忽並來弼予民無瘥札曰衍汝來汝  
予黃髮事予二紀毛禿豁心如一兮率履弗越遂長  
樞府兵政無蹶予早識琦琦有奇骨其器魁樞豈視居  
契其人渾樸不施剗剗可屬大事敦厚如勃琦汝副衍  
知人予哲惟脩惟靖立朝轍轍言論礫砢忠誠特達祿

微身賤其志不怯嘗詆大臣亟遭貶黜萬里歸來剛氣  
不折屢進直言以補予闕素相之後含忠履潔昔為御  
史幾叩予榻至今諫疏在於箱篋襄雖小臣名聞予徹  
亦嘗獻言箴予之失剛守粹慤與脩儔匹並為諫官正  
色在列予過汝言無鉗汝舌皇帝明聖忠邪辨別舉擢  
俊良掃除妖魃衆賢之進如茅斯拔大姦之去如距斯  
脫上倚輔弼司予調燮下賴諫諍維予紀法左右正人  
無有邪孽予望太平日不逾浹皇帝嗣位二十二年神

武不殺其默如淵聖人不測其動以天賞罰在予不失  
其權恭已南面退姦進賢知賢不易非明不得去邪惟  
艱惟斷乃克明則不貳斷則不惑既明且斷惟皇之德  
羣下踧踖重足屏息交相告語曰惟正直毋作側僻皇  
帝汝殛諸侯危慄墮玉失為交相告語皇帝神明四時  
朝覲謹脩臣職遠人走馬墜鐙遺策交相告語皇帝神  
武解兵脩貢永為屬國皇帝一舉羣臣懾焉諸侯畏焉  
遐荒服焉臣願陛下壽萬千年

# 汴渠

隋帝荒宴遊厚地剗為溝萬舸東南行四海困橫流義  
旗舉晉陽錦帆入揚州揚州竟不返京邑為墟丘吁哉  
汴渠水至今病不瘳世言汴水利我為汴水憂利害我  
豈知吾試言其由汴水濬且長汴水湍且道千里瀉地  
氣萬世勞人謀舳艫相屬進餽運曾無休一人奉口腹  
百姓竭膏油民力輸公家斗粟不敢收州侯共王都尺  
租不敢留太倉粟我我冗兵食無羞上林錢朽貫婪官

求要優吾欲塞汴水吾欲壞官舟請君簡賜予請君節  
財求王畿方千里邦國用足周盡省轉運使重封富民  
侯天下無移粟一州食一州

麥熟有感

癸酉  
中作

去年經春頻肆赦拜赦人忙走如馬五月不雨麥苗死  
赦頻不能活窮寡今年經春無赦書十日一雨及時下  
五月麥熟人民飽一麥勝如四度赦吾願吾君與吾相  
調和陰陽運元化陰陽無病元氣活風雨調順苗多稼

使麥長熟人不饑敢告吾君不須赦

讀詔書

乙亥  
中作

關中有山生虎狼虎狼性尅不可當去歲食人十有一  
無辜被此惡物傷守臣具事奏聖帝聖帝讀之惻上意  
乃詔天下捕虎狼意欲斯民無枉死吾君仁覆如天地  
只知虎狼有牙齒害人不獨在虎狼臣請勿捕捕貪吏

三豪詩送杜默師雄并序

本朝八十年文人為多若老師宿名不敢論數近世

作者石曼卿之詩歐陽永叔之文辭杜師雄之歌篇  
豪於一代矣師雄學於予辭歸作三豪詩以送之

曼卿豪於詩社壇高數層永叔豪於辭舉世絕儔朋師  
雄歌亦豪三人宜同稱曼卿苦汨沒老死殿中丞身雖  
埋黃泉詩名長如冰永叔亦連蹇病鸞方騫騰四海讓  
獨步三館最後登師雄二十二筆距獐如鷹才格自天  
來辭華非學能迴顧李賀輩麤俗良可憎玉川月蝕詩  
猶欲相憑凌曼卿苟不死其才堪股肱永叔氣甚閎用

之王道興師雄子勉旃勿便生驕矜

贈張績禹功

李唐元和間文人如蠶起李翱與李觀言雄破姦宄孟  
郊及張籍詩苦動天地持正不退讓子厚稱絕偉元白  
雖小道爭名愈弗已卒能霸斯文昌黎韓夫子吾宋興  
國來文人如櫛比黃州才專勝漢公氣全粹晦之號絕  
羣平地走虎兕謂之雖駁雜亦文中騏驎白稹洎盧震  
江沱自為水朱巖兼孫僅培塿對獄峙卒能霸斯文河

東柳開氏嗟吁河東沒斯文乃屯舌汨汨三十年滛哇  
滿人耳粵從景祐後大儒復唱始文人如麻立縱橫攢  
戰騎徂徠山磊砢生民實頑鄙容貌不動人心膽無有  
比不度蹄涔微直欲觸鯨鯉有慕韓愈節有肩柳開志  
今讀禹功文矛戟寒相倚寶光千里高飛出破屋裏龍  
音萬丈長拔出重淵底雷霆皆藏身日星皆失次我慙  
年老才力漸衰矣禹功氣奔壯今方二十二前去吾  
之年猶有十四歲今讀禹功文魂魄已驚悸更加十四

年世應絕儔類卒能霸斯文吾恐不在已禹功幸勉旃  
當仁勿讓爾

西北

乙亥  
中作

吾嘗觀天下西北險固形四夷皆臣順二鄙獨不庭吾  
君仁泰厚曠歲稽天刑萌芽遂滋大屯聚若丘陵漸聞  
頗驕蹇牧馬附郊坰吾恐患已深為之居靡寧堂上守  
章句將軍弄娉婷不知思此否使人堪涕零

乙亥冬富春先生以老儒醇師居我東齋濟北張

洞明遠楚宮李溫仲淵皆服道就義與介同執

弟子之禮北面受其業因作百八十二言相勉

鳳皇飛來衆鳥隨神龍遊處羣魚嬉先生道德如韓孟  
四方學者爭奔馳濟北張洞壯且勇楚丘李溫少而奇  
二子磊落頗驚俗泰山石介更過之三人堂堂負英氣  
胷中拳拳蟠蛟螭道可服兮身可屈北面受業尊為師  
先生晨起坐堂上口諷大易春秋辭洪音琅琅響齒牙  
翊贊孔子興宏義先生居前三子後恂恂如在汾河湄

續作六經豈必讓焉無房杜廊廟資吁嗟斯文敝已久  
天生吾輩同扶持二子勉旃吾不惰先生大用終有時  
當以斯文施天下豈徒玩書心神疲

過魏東郊

全魏地千里雄大視區宇黃河為血脉太行為筋裔地  
靈育聖賢土厚含文武堂堂柳先生生下如猛虎十三  
斷賊指聞者皆驚怖十七著野史才俊凌遷固二十補  
亡書辭深續堯禹六經皆自曉不看注與疏述作慕仲

淹文章肩韓愈下唐二百年先生固獨步投篇動范杲  
落筆驚王祐四方交豪傑羣公走聲譽一上中高第數  
年編士伍五命為御史連出守方土事業過皋夔才能  
堪相輔鳳皇世不容衆鳥競嘲訴獄中饑不死特地生  
爪距貌貅十萬師盟津直北渡塞上諸猛將低頭若首  
鼠渴憶海為漿饑思鼇為脯兩手拏人肝大牀橫斗肚  
一飲酒一石賊來不怕懼帳下立孫吳樽前坐伊呂笑  
談韜鈴間出入經綸務匈奴恨未滅獻策言可虜幽州

恨未復上書言可取好文有太宗好武有太祖先生文  
武具命兮竟不過死來三十載荒草蓋墳墓四海無英  
雄斯文失宗主豎子敢顛狂黠寇敢慢侮我思柳先生  
涕汨落如雨試過魏東郊寒鴉啼老樹丈夫肝膽喪真  
儒魂魄去瓦石固無情為我亦慘沮

蜀道自勉

潮陽瘴煙黑去京路八千吏部有大功得罪斥守藩朝  
衝江霧行夜枕江濤眠蛟蜃作怪變時時攀船舷魚龍

吐火焰往往出波間故為相恐怖倏忽千萬端道在安  
可劫處之自晏然我乏尺寸効月食二萬錢自請西南  
來此行非竄遷蜀山險可升蜀路高可緣上無嵐氣蒸  
下無波濤翻步覺閣道穩身履劒門安惟懷吏部節不  
知蜀道難

聞子規

月上半峰峰樹碧子規啼苦月無色壯士耳邊都不聞  
兒女眼中淚自滴古人出處非關身處分事親出事君

服勤至死不敢倦避勞擇逸豈所聞我看蜀道誠為難  
嗟爾子規何云云王遵九折竟叱馭起萬里圖立勲  
乘危蹈險盡臣節二人至今揚清芬我本魯國一男子  
少小氣志凌浮雲精誠許國貫白日有心致主為華勲  
位卑身賤難自達滿腹帝典與皇墳有時憤懣吐一言  
小人謗議已紛紛宰相寬容天子慈八年之中三從軍  
從軍官清吾何苦嘉州路遠爾勿語地不為我易其險  
我豈守道不能固子規子規漫啼絕斷無清淚灑向汝

哀隣家

隣家不選醫醫無救病術朝一醫工入暮一醫工出有  
加而無瘳皇皇不安室吁嗟鄰翁愚予為病者恤瞽醫  
一日更千人盲藥何能療沉疾

觀碁

人皆稱善奕伊我獨不能試坐觀勝敗白黑何分明運  
智竒復詐用心險且傾嗟哉一枰上奚足勞經營安得  
百萬騎鐵甲相磨鳴西取元昊頭獻之天子庭北入陰

山界馘俘以南行東逾滄海東射破高麗城南趨交趾  
國蠻子輿觀迎盡使四夷臣歸來告太平誰能憑文楸  
兩人終日爭

贈劉中都

吾登泰山上下視何紛紛彼角而走者孰為麀與麀彼  
茁而生者孰為蕭與芸伯樂不復出駑驥終同羣卞和  
不再生珉玉將誰分吁哉劉中都高標凌浮雲諸侯不  
薦士外府不策勲冉冉趨黃綬勤勞徒爾云我媿勢力

小不能叫吾君勿改芳蘭性林深須自薰勿隱沖鶴聲  
天高當自聞

感事

吾嘗觀中夏地平如砥石幅員數萬里車馬知轍迹帝  
宅居土中紫垣當辰極長江斷其南絕塞經其北東海  
西流沙天定安邊畫三代千餘年天子雖務德實以險  
為恃四夷皆潛匿漢唐德稍衰地勝豈殊昔暫來還亟  
去不敢窺城壁石晉一失謀六州淪邊域天地破局鐫

山川無阻阨貽爾子孫惠固知非遠策桓桓周世宗三十纂璫歷一歲破河東劉崇喪精魄再歲復秦鳳不庭自柔格三歲出南狩王師拯焚溺江北十四州取之如卷席四歲征關南曾不發一鎗三州相繼降德聲暢蠻貊李昇請臣妾錢鏐修貢職帝欲因兵鋒乘勝務深擊直取幽州城拓土開疆場重收虎北口復漸平兇逆是時戰屢捷六軍氣吞敵平吳如破竹成功在頃刻惜哉志不就暴疾生中夕帝宋承大寶聲名發丕赫全蜀獻

土地舉吳上圖籍荆潭與甌閩助祭來匍匐開城納江  
俘御樓受晉馘區內一正朔六州獨割剔憤憤柳崇儀  
才宏包旦爽生長在河朔耳目熟金革旗鼓朝治兵酒  
斝夜結客握臂說心誠倒囊推金帛客以豪傑士遇侯  
頗感激往來達厥誠生死願效力萬德納我說洞然絕  
嫌隙事成已有萌侯去何云亟豪傑夜空回帳中屢嘆  
息我覽此二事天意終難測撫卷一感傷兩睫淚潛滴

安道登茂材異等科

嘗言春官氏設官何踞蹠屑屑取於人辭賦為程約一字競新奇四聲分清濁矯矯遷雄才動為對偶縛恢恢晁董策亦遭聲病落每歲棘籬上所得多浮薄嗟哉浮薄流不知王霸略六經掛東壁三史束高閣瑣瑣事雕篆區區衍述作隨行登一第謂身翦寥廓趨衆得一官謂身縻好爵棲棲咫尺地燕雀假安託汲汲五斗米鴈鷺資飲啄壯哉張安道少懷夫子學三就禮部試不肯露頭角恥用衆人遇羞將一賦較甘心塌翼歸志懷本

卓犖三賢文章師

大參宋公副樞蔡公計相范公連章稱薦

儒林推先覺百

鳥聲喈喈獨能辨鶯鶯玉石方混混獨能識至璞薦之

于天子此材堪輪栴遂得望清光三接近帷幄僚友視

萬乘器宇誠嶽嶽願乞數刻景古今可揚榷縱橫三千

言得雋如奪槩上下馳皇王周旋騁禮樂遠推災異源

上究星文錯直言補王闕危論針民瘼天子覽其奏嘉

賞為嗟愕既嘆相見晚且言同時樂一命校秘書恩澤

優且渥追惜漢武世仲舒道磽确再念文宗朝劉蕡命

蹇剝有才無其時徒抱此誠慙吾君嗣丕基百王慙景  
鑠萬物蒙休嘉四夷奉正朔賢良得其時才命不相虐  
一謁乃大遇君臣無隔膜我賀吾君明取士得英卓我  
賀吾道行逢時不蹉跎行願入廟廊鈞軸在掌握上使  
斯文淳下使斯民樸五帝從可追三王豈為邈

感興

村居何所適種木樹桑梓田園繞家舍遠不逾十里款  
段足乘騎代步而已矣但識畜鴛鴦安知有騏驥臘月

北風寒太行山色紫君命急如火城頭見烽燧雪深馬  
僵倒十夫扶不起軍法有明訓後期者誅死倚鞍思駿  
骨撫轡念綠駟求之不可得殽觶滿眼淚旁聞負薪叟  
竊語相譏刺居安常念危在險如處易臨難始求濟狼  
狽徒勞爾有備則無患古人垂深旨平居無事時華廐  
深秘遽善穀與豐草秣飼十廐吏驚駘飽相枕素餐不  
知愧伯樂能識馬每來如勸說飛兔與騾褭日牽在都  
市為愛千金資貪恪不肖置今日臨艱難勞力自勉勵

又送從道

常欲飽暖天下人其道未得一寸施子有二親皆七十  
糠覈不充常寒饑昨日訪我破屋下具鷄一隻酒一庖  
子起却盤筋不舉吾親未審曾食之對我噓噓涕泗下  
孝子之心真可悲子固與我同一體相間豈復有毛皮  
顧子之親則吾親吾親凍餒無奈何飽暖天下心徒為  
送子出門成此詩

偶作

晉公平淮西兵出速如神  
崇韜伐西川六十日請臣  
太祖受命諸侯未盡賓  
蜀廣號敵國荆潭為疆隣  
王師討有罪不聞逾十旬  
元昊誠螻蟻有地長一畛  
詎足污斧鉞尋當投荆榛  
是何逾歲月務行含貸仁  
豈茲將帥間迥無晉公倫  
張旗發一號豈無李處耘  
提戈出一戰豈無王全斌  
容茲盈寸蟹蕩漾於流津  
平生讀詩書胸中貯經綸  
薄田四五畝甘心耕耨勤  
倚鉏西北望涕淚空沾巾

送李唐病歸

春風汶水溫曉日徂徠寒之子銜病歸請予開一言予  
知去病術為子陳大端予嘗學聖人試將道比論道病  
非一日善醫惟孔韓賞罰絕于周孔筆誅其姦春秋十  
二經王道復全完佛老熾于唐韓刀斷其根原道千餘  
言生民復眠食道病由有弊邪偽容其間身病由有隙  
風邪來相干子欲治斯道絕弊道乃存子欲治子身杜  
隙身乃安此理近古鑒吾言有本源

# 蝦蟇

夏雨下數尺流水滿池泓蝦蟇為得時晝夜鳴不停幾  
日飽欲死腹圓如瓶罌鉅吻自開闔頭項或縮盈時於  
土坎間突出兩眼睛是何癡形骸能吐惡音聲嗟哉爾  
肉臙不中為犧牲嗟哉爾聲麤不中和人情殊不自量  
力更欲睥睨橫海之鱣鯨自謂天地間獨馳善鳴名萬  
物聒皆聾不知鐘鼓欽欽雷霆閔閔應龍戢腦入海底  
鳳皇舉翼摩青冥此時各默默以避蝦蟇鳴何時雨歇

水澤涸青臭泥中露醜形失水無能為兩脚不解行乾  
渴以至死盡把枯骸填土坑

寄雷澤張從道

不知有凍死一室心恬如臘盡妻未褐天寒子讀書澆  
風與世薄古道于時疎事事皆同我憶君春草初

訪田公不遇

主人何處去門外草萋萋獨犬睡不吠幽禽閒自啼老  
猿偷果實稚子弄鋤犁日暮園林悄春風吹藥畦

蘇唐詢秀才晚學於予告歸以四韻勉之

憐我山中臥半年相伴吟道傳諸子後易得數文深爨  
或經年絕書猶盡日尋惜哉未終業親老忽霑襟

歲晏村居

歲晏有餘糧杯盤氣味長天寒酒脚落春近臙頭香菜  
色青仍短茶芽嫩復黃此中得深趣真不羨膏粱

送奉符縣監酒稅孟執中借職

蜀主  
之後

東西兩處各天涯去國還鄉喜又嗟鄒嶧山藏孟子宅

自言孟  
軻後  
海棠花落蜀王家深知周道非彝酒可罪唐臣

乞稅茶三載此心無一事聞經絳帳日常斜

事退日就於明復先

生問  
道

予與元均永叔君謨同年登科永叔尋入館閣元  
均今制策高第君謨後磨礪元均事業獨予駕  
下因寄君謨

網羅當日得英雄文陣三人各立功海裏赤鯨疑有角  
雲中騏驎欲追風尋聞館閣英聲出又見賢良大對通

亦說年來畜奇業  
蟪蛄何計逐飛鴻

寄元均

君為儒者豈知兵  
何事欣隨璧馬行  
裴度樽前坐韓愈  
趙成帳下立荀卿  
禦戎誰道全無策  
對壘寧妨下一枰  
須信乾坤養不肖  
年三十七卧柴荆

赴任嘉州初登棧道寄題姜潛至之讀易堂

我不辭官君下第  
其間險易兩何如  
連雲棧外四千里  
讀易堂中一帙書  
慈母含飴垂禿髮  
先生懷道接茅廬

莫將清淚頻頻灑蜀道之難欲上初

左綿席上呈知郡王虞部

王與介前任同在睢陽

何事相逢悲喜并倏然相別二周星主人鬢髮無多白  
幕客襦衫依舊青目極同思故山斷涕危共在異鄉零  
階前絲竹雖嘈雜不似南湖湖上聽

睢陽南湖宴將之所也

士廷評相會梓州

道視荀揚雖未至分如管鮑已知深一千二百日離別  
五十六驛外相尋重欲同君注周易且來共我聽胡琴

月留屋角不下去似與清風憐苦吟

鄭師易秀才詩奔騰道壯殆有石曼卿學士風骨  
作四韻以勉之

曼卿續得少陵絃絃絕年來又一年驚起聽君諷新句  
灑如開集味遺篇一家氣骨疑無偶萬丈光芒欲拂天  
好向風騷尤著意他時三箇地詩仙

留題敏夫隱居

幾迴到此尋逋客杯案蕭疎滋味長山飯半甌椽子熟

春蔬一筋木苗香四時泉石應無夏滿谷雲霞別是鄉  
終待共君結鄰里竹邊相並兩間房

訪竹溪呈孟節兼有懷熙道

到頭泉石是吾家坐石聽泉日已斜一片青山非富貴  
千竿綠竹是生涯君曾覽照頭皆雪我試看書眼亦花  
便好結為山伴侶教他夔益佐勲華

招張洞明遠

君言下第我西飛執手都門淚滿衣萬里得歸頭半白

經年相別道應肥火鑽欲遍龜難死竹實猶多鳳不飢  
暫到東山慰愁抱春秋之學說深微

### 村居

幽居一畝枕溪稜堦下杉松纏古藤常愛園林深似隱  
不嫌門戶冷如僧麥宜過社猶催種山近經秋却懶登  
已把壯心閒頓置少年莫要苦相憎

### 燕枝板浣花牋寄合州徐文職方

合州太守髯將絲聞說歡情尚不衰板與歌娘拍新調

賤供狎客寫芳辭木成文理差差動花映溪光瑟瑟奇

名得只從嘉郡樹

燕枝本嘉州出

樣傳仍自薛濤時

有薛濤賤

奇章

磊磊馳聲價江令翩翩落酒卮幾首詩成卷魚子

有魚子賤

誰人唱罷泣燕枝紅牙管好同牀置紫竹笙宜一處施

願助風流向樽席杏花況是未離披

司空圖有杏花辭文頃在睢陽多命

之唱

### 送馮司理之任彭州

李白詩中蜀道難把詩試讀浹瀾江形詰曲千迴折

嶺路峻增萬屈盤登陟去年腰僅折追思今日鼻猶酸

予去年罷嘉州歸

此行君不同屯蹇五馬相知舊長官

彭牧與君常同

官

赴任嘉州待闕左綿七十日通判呂國博日相從  
吟酌至嘉陽因成韻寄之

鼎來豈敢道能詩一見何因便解頤鄉國三千里離別  
杯盤七十日相知送人江外馬馱妓垂釣寺中魚竭池  
別後中秋又重九與誰賞月詠東籬

泥溪驛中作

嘉陵江自大散關與予相別二十餘程至泥溪偕予去因有是作

山驛蕭條酒倦傾  
嘉陵相背去無情  
臨流不忍輕相別  
吟聽潺湲坐到明



宋詩鈔卷十四



總校官庶吉士臣張能照  
校對官庶吉士臣陳文樞  
謄錄貢生臣潘沛然

欽定四庫全書薈要

集部  
宋詩鈔卷十五



詳校官候選知縣臣吳蘭華

欽定四庫全書薈要卷二萬二百六十八

朱部

宋詩鈔卷十五

內閣中書舍人吳之振編

武仲清江集鈔

武仲字常父臨江新喻人至聖四十八代孫也舉

進士中甲科調穀城主簿教授齊州為國子直講歷  
秘書正字校書集賢校理著作郎國子司業論詆王  
氏進起居郎侍講邇英起居舍人旋拜中書直學士

院擢給事中遷禮部侍郎以寶文閣待制知洪州改  
宣州坐元祐黨奪職居池州卒年五十七與兄文仲  
弟平仲並有文名時稱二蘇三孔元祐文人之盛大  
都材致橫濶而氣魄剛直故能振靡復古如三孔者  
皆文章之雄也然文仲恃才為蘇氏所使攻毀程子  
晚知懊恨歐血而沒君子病之集藁罕傳周益公時  
搜合為三孔清江集已不可多得矣一言不知令名  
剝落為文人者每得罪聖賢不必為奸邪而卒不得

與于君子豈獨一文仲哉作者不可以不慎也因附  
其遺詩數首於末文仲字經父舉進士官至諫議大  
夫中書舍人

馬齧麥

馬齧麥僕飲冰北風軒軒搖丘陵十日吁可驚南山喜  
見朝日升尋陽北岸霜泥薄窮臘獨為千里行五里聊  
一止十里復一息楊柳弄輕黃已作春顏色川原入眼  
雖似快時節去家還可惜齧麥不須飽飲冰勿畏寒起

鞭移擔復五里帝鄉即在須臾間悠哉役夫勉桓桓征  
途幾何莫永歎亦莫悲歌行路難

兒歸行

竹元珍云澤州山中暮春之月有烏啼曰兒歸者其  
聲甚哀問之鄉民云昔有里婦愛其子而憎前室之  
子欲逐之未有計乃於種麻時熟其半生其半使二  
子分種曰麻生乃得歸而誤以熟者與已子久之所  
惡之子歸而已子不返往視之則已化為飛禽啼曰

兒歸今鄉人以為種麻之時候余以謂人之憎愛藏乎胸中陰謀所發乃在分種之際而心手倒錯事與願違朝人暮禽子母生隔似有巧者主張幹旋于冥冥之間天網雖疎其應甚密則夫為人上而接其下用心積慮可不戒哉又知天之所以垂戒示迹于人者殆將使之推類以自廣非獨此一女子也乃作詩以記之

兒歸兒不歸朝為子母歡暮為禽鳥飛故居不得返深

林安可依此身寂寞已如此我母在家應憶子子今豈  
不思其親空有舊心無舊身兒歸兒不歸春已暮朝多  
風夕多雨山雖有泉隴無忝兒寒有誰訴兒飢與誰語  
萬物卵翼皆相隨兒今不得見予母兒歸兒不歸年年  
三月種麻時此聲煩且悲聞昔一母而兩兒子已所生  
獨愛之麻生指作還家期唯憎者來愛者去物理反覆  
不可知天公豈欲故如此善惡報敏如墳麓至今哀怨  
留空山長為鑒戒子母間豈獨行客愁心顏兒歸推痛

傷心肝

車家行

上坂車聲遲下坂車聲快遲如鬼語相喧呌快如溪沙  
瀉鳴瀨一車人十捧擁行江南江北不計程青天白日  
有時住無人止得車輪聲晚來驟雨聲濯濯平曉郊原  
盡溝壑方悟車家進退難不如田家四時樂

猗猗堂下竹

猗猗堂下竹我來初萌芽生意甚蹇薄纔能出泥沙狂

霖一夕作霹靂連轡車回首未幾日其成何速耶脩然  
數尺高秀色蔚以佳餘陰過盆池喜躍見魚蛙乃知地  
道敏不待歲月賒念彼遠遊子聯翩入京華勢力勇奔  
趨被服爭豪奢外雖逐喜好顧盼相陵夸中乃昏智識  
有損無增加曾竹之不如徒此草木花經風已簸落枯  
槁良可嗟而我方涉世浩渺無津涯因竹亦自悟慨歌  
牕日斜

與廖開甫自淮南同行赴舉相別五年復相遇於蘄

水縣為詩贈之

來書吾初走夷門傾蓋得君恨不早  
蘭溪駐馬復相逢  
二紀飛馳如電埽惜君憔悴力不任  
顧我滄浪髮先皓  
憶昔同行氣頗驕青驄馬快鞍韉好  
荒山破屋風豪橫  
大澤長堂雪傾倒高談灑落見天機  
健句縱橫攄腹藁  
辛勤始得到京邑文辭不入春官考  
可憐六翮委沙泥  
坐看羣仙上蓬島壯年多難寸心折  
勁鏃已哀難破綯  
而君施設有餘才西佐元戎奪城堡  
牛刀拂拭試一懸

如引滄溟灌行潦歸來赴愬天子庭正欲披腹呈瑰寶  
片辭未吐疾先入藜杖扶行色枯槁籃輿復指天涯去  
長川橫濫聲浩浩驂騑不日歸王閑那久低摧臥霜草  
久長驛書事

空堂深深閃燈燭羣奴鼾眠聲動屋豆肥草軟馬亦便  
嚼美只如蠶上簇天事由來不可量初更月出星煌煌  
須臾變作霏霏雨客枕不眠知夜長

題鮑家鋪

郵亭秣馬朝寒天雪壓寒山山湧泉隴頭客飢欲噤口  
屋底人閒猶鼾眠敲門得薪感相濟征衫如洗賴火然  
江南亦有安棲處却羨郵亭人穩住

舍轎馬而步

寒風駕雪霜吾轎頗溫煖白日煖郊原吾馬快馳逐二  
者皆得用翩如兩黃鵠馬驕倦提策轎狹厭攣束何以  
救斯弊奔馳有吾足副之兩革靴隨以一筇竹鳬趨上  
高岡虎步出平陸折花得低枝照影臨深谷道逢田間

叟時訪以耕牧北音稍入耳俚語俄滿腹行行及前堆  
小汗已霏霏芳草可為茵吾眠不須褥人生忌太佚終  
歲居華屋醉飽耳目昏軟暖筋骸縮今吾異于此千里  
干微祿朝隨磨磨騁夜侶鴻雁宿戶樞勞乃久金礦鍛  
方熟聊歌以自娛不作楊朱哭

送李大夫管勾太平宮居袁州

康定慶厯披羣英公為布衣歌太平熙寧元豐王道興  
公作太守逢休明四十年間走四海岷然不肯干公卿

峩峩正議天柱壯皎皎素節冰壺清胸中慷慨外間易  
年高未見白髮生罷節巴陵歸意銳奈何去就不收輕  
馳歸天寵乞閒散諸郎惜祿猶屢爭毅然不與兒女計  
飛章丹宸論赤誠明朝果得琳宮去匡廬山色遙相迎  
玉溪氣象自瀟灑新磨古鏡當霄橫脩篁萬竿飽霜雪  
枯碁一局酒滿觥時邀賓朋叙野史間擁雪鶴登巖扃  
安排丹鼎夜不寐邂逅黃金燒可成未應謝傳入滄海  
行見盧敖朝玉京

代簡答次中見留

詩誇洞庭湖蓋舉其粗爾自此稍南行更有瀟湘水瀟  
湘如此流淺深清見底吾邑在其旁桑麻百餘里民經  
南巡後淳龐猶可喜白酒日相漉鱸魚夜成市念方從  
吏隱小官不為恥先期了賦租隨時用鞭箠此外無餘  
事看山聊隱几還作小詩篇寄聲前御史御史吾故人  
風義今為偉起遷未復甚久仆行復起但使交期在不  
須論遠邇今夕宿朱僊相望月明裏

入關山

輕輿兀兀乘朝暉漸入山徑行逶迤昨日喜與山相見  
今日得與山相隨山中老翁迎我笑借問久矣來何遲  
答云王都富且樂四方車馬皆奔馳我雖疎慵亦勉強  
天恩得邑方南歸山林市朝不同調公雖高簡宜無譏  
老翁聞語更驩意為我煮水燒松枝山家十錢得升酒  
勸我引觴聊沃飢為翁一奏白雪曲翁亦為我歌紫芝  
此聲淡泊極有味徃徃世俗無人知山中之樂有如此

嗟我捨此將焉之

新安鋪三首

罩罩澗中草泠泠山崦泉泉甘而草芳旁有屋數椽夕  
陽漸近西風起行客山頭望千里

薄雲斜日亂山川投得荒亭晚息肩地僻誰知藏好景  
庭前花數折金錢

罩如秋水憩迴廊素月分輝百倍涼山木交加無意緒  
故欺殊影到人牀

# 宿天池

我思廬山遊發興自年少偶來得閒侶更欲窺衆妙幽  
林穿濛籠青峰上嶮峭遙看天池路一線在巖微辛勤  
得至此慘寂已西照雲池桂無根瞪視心膽掉暮夜煙  
雲昏西巖亦登眺聖燈稍稍出弄影何窈窕一枝分百  
點變態不可料須臾歸寂滅何處觀朕兆僧房得棲宿  
爽氣冰毛竅翻然亦興盡却恨歸途寫紉懷道隆師確  
不奉明詔似與山間石慙慙論久要我今來時迫繡衣

真可笑明朝指誰谷裹足登涼轎

時足瘡未愈

揩却壁上名

恐為高人誦

### 尋真觀

武皇車駕東南出訪道求仙希萬一屏風九疊雲物清  
意恐神仙藏此室羽章之館締構新壇塲夜夜祈星辰  
蓬萊縹緲不可到橋山一閉逾千春詠真之天在旁側  
白晝潭心飛霹靂田收歲美龍亦閒唯有濟淪照空碧  
誰道尋真是女郎朝飡松桂夜焚香明眸綠髻今何在

意已霞衣侍玉皇

松上老藤

在二聖寺

古木已昂藏長藤亦奇怪潛根蒼蘚中矯尾青雲外  
嚴秋霜剝悠悠夏景曬摧殘復長養鍛鍊成老大蛇蟠  
筋脉壯龍死軀殼在他時雷破山大雨灑滂沛茲松若  
變化無乃遭結害附枝物所患奪朱古為戒何不淬斧  
斤誅鋤此蕭艾

高臺歌

廢地積為冢昔曾宴遊來冢廢無子孫東家砌成臺臺  
雖平方冢雖秃物理廢興有往復相逢莫喜亦莫愁乘  
興且同臺上遊

賦張芸叟蕃刀

王師前年下靈州先生奉詔為叅謀軍書堆案不足道  
欲斬名王懸髑髏官供器械如山積裝結雖巧體質浮  
傳聞蕃刀最可用買置不惜千金酬沙河洗滌血痕盡  
瑩若一水橫清秋長庚輝輝奪明月光景迸溢不可收

軍回倉卒未及試提挈萬里來荒陬空齋倒掩閱圖史  
深林永日號猩鼯揮鳴且欲驚暴客敢議與國平冤讐  
夜郎蒙恩放李白炎嶺得旨還幽求輕舫共泊長沙岸  
幾日對語清湘樓紅蓮幕中邀客飲霧雨咫尺迷汀洲  
雜花落盡無處覓官妓遣歸不敢留清歡未免假外物  
共說鐵劒勝倡優君家所寶世稀有滿坐傳看驚殊尤  
護之太過却銹澀頑蘚鬱結纏蒼蚪橫磨十萬祗虛語  
得此已足馳燕幽今公又應元戎辟真能寸截鯨鯢不

却生入幕宜有畫定遠出塞將封侯我今喜得隨君去  
長江渺渺平天流路危或恐逢水怪尾脊崔嵬當吾舟  
煩公一效飲飛勇為公椎鼓傾金甌

張秉叔出紫雲回鑒圖以示坐客因為賦之

開元太平無兵戎真人味道希夷中人間之樂已饒足  
唯有青霄未追逐坐中誰似葉先生以氣為糧常辟穀  
朝登員嶠夕崑崙只與神游不要人忽逢邀攜看月去  
縹緲虛空生紫雲蟾宮竟不容久住仙樂飄飄送回太

歸來宮漏未移更甲帳明釭宛如故汾水悲歌仙不成  
梨園空沒有遺聲紅塵如海漲朝市從此無人遊玉京  
祠二廟之明日未得順風呈同行

岳州西祠從古有控帶洞庭湖之口前對隱顯明滅之  
湘山下接瀟湘洶湧之長川茫茫白沙連絕巘淡淡古  
木蟠蒼煙昭靈王左安流右翠帳朱幡擁前後鋸牙虎  
視森兩廂氣骨生獐欲奔走我來纜舟日已昏袍韉跪  
聽祠官言伏興進退如法式四顧詭譎驚心魂平明結

東舟將解叱吸仍聞北風大焚香奏酒殊無計伏渚藏  
汀姑有待二王威神世所傳矜攝鬼怪賓靈仙好風相  
送勢不難舒卷造化須臾間波回草動似有意舉棹開  
帆即千里吟詩賞月岳陽樓買魚沽酒巴陵市

廟下候風呈同行

楚水千百源洞庭為壯觀勢居七澤右地裂荆吳半而  
我泛扁舟飄然一歸鴈來之豈為益公亦未足算胡不  
吹清波縱發如飛翰朝辭廟山曲午泊巴陵岸況有三

面風迎送俱無間定非偏薄厚以掇行旅訕奈何苦流  
滯兀兀晨復旰食芹朝當蔬伐竹暮供爨舟師三十人  
餓虎奔芻豢使之裹糧絕慮有探囊患二王東南望貌  
像頗輝煥歌鼓歲無休香燈夜侵旦我為江湖士乞靈  
從弱冠四到祠宮下霜髯今已粲王其故舊邱勿以塗  
人看尊師况慈忍善道陰有贊王心或未回師頗固宜  
緩杯琰似見許歸來整檣幔

炭步港觀螢

九華之南蘆葦長流螢夕起不計雙爛如神仙珠玉闕  
青羅掩映千明缸空江沉沉未見月近浦穿林起還滅  
魚遊鳥宿自不驚我知此火初無情

泊趙屯

憶昨省覲趨濡川萊衣擁綠方少年艱難險阻俱未歷  
孟浪勇決唯爭先舟發趙屯猶未飯有風北起空濛間  
掀搖三山欺五岳巨浪倒潑東南天千林向人俱頓仆  
兩岸過眼真飛騫帆檣迴戛河漢底鷗首俯飲蛟龍淵

跳波濺沫來四面坐中時得鯉與鱣妻啼婢訕殊不顧  
兀坐正讀逍遙篇為言方破萬里浪不爾捉月為神仙  
江中逢巨石頗突為引牽逡巡水勢亦平緩幸免肝脛  
輸烏鳶暮投彭澤宿荒草神驚魄顫何能眠自茲稍悟  
垂堂戒鞶紋纔起不敢前矜持太過僅無患往往所至  
傷留連乃知老謀與壯事心膽殊異難兼全重來此地  
畏洶湧藏舟別浦看漪漣魚跳鷗下自可喜何用蛟鱓  
飲流涎斜陽依依照草木夾岸葭莢鋪書氍毹今弱冠

昔何有昔頷無鬚今皓然二十餘年纔瞬息時事幾蛻  
如秋蟬區區走俗亦何賴安得尺地巢林泉

清溪詞

譙門之南溪水長斜暉倒閃青銅光下與長江作支股  
愁霖漲天江潦黃江潦黃入清溪清溪到底終無泥還  
如初出秀山時

瓜步阻風

昨日焚香謁聖母青山鞠躬如負弩但乞天開萬里明

埽去浮雲戢風雨謂宜言發即響報豈知神不聽我語  
門前白浪如銀山江上狂風如怒虎舩癡艣硬不能拔  
未免棲遲傍洲渚輕盈但愛白鷗飛顛頓可憐芳草舞  
三江五湖歷已盡勢合平夷反齟齬上水歌呼下水愁  
北舩縈絆南舩去寄言南舩莫雄豪萬事低昂如桔槔  
我當賣劍買牲牢再埽靈宇陳肩尻黃金壺樽沃香醪  
神喜借以南風高揚帆拍手笑爾曹不知流落何江皋  
荒洲寂寥聽怒號



賦碼磬笛

弟叔父  
所藏也

羌兒吹笛作龍吟中有太古之純音伊人已死笛仍在  
千古月明江水深誰知巧匠尋山谷蹙踏溪雲採明玉  
雲容芝彩光復黯淺紫輕紅花映肉正聲隱顯初無端造  
化推移指法間黃鐘妍美霜朝暖無射淒涼暑月寒軺  
車走遍天南北此笛此聲何處得韜之湘竹川錦囊廣  
坐聊持街賓客弘農學士九尺長頰顴山起髻髯張從  
容奏罷陽春曲氣衰坦腹眠繩牀由來雅器自有合不

與教坊管絃雜君不見開元名臣宋侍中手揮羯鼓疾如風

送范中濟侍郎知慶州

平時廣朝中相見輒歡喜昂藏八尺身所負必奇偉四方欲善敗軍國盈虛計叩之如川流滾滾不知已天子曰汝能吾臣鮮其比而况所設施粲在四邊鄙西方未純一汝可三軍帥擒之或縱之高枕惟爾恃公拜稽首歸眉目凜生氣頑童玩天恩泰養若驕子欲痛以鞭笞

而畏啼不止二者不兩全在所以節制又如畜狂犬繫頸不繫尾收其要害處進退隨所指重城徹關塞沙漠淨如水辭別不躊躇安邊從此始

江豚詩  
四言

黑者江豚白者白蜃狀異名殊同宅大水淵有羣魚掠以肥已是謂小害顧有可喜大川夷平縞素不起兩兩出沒矜其頰觜若俛若仰若躍若跪舟人相語驚瀾將作亟入灣浦踣檣布筏俄頃風至簸山搖岳浪如車輪

氛霧相薄舟人燕安如在城郭先事而告昭哉爾功鰓  
啗牛馬頭鼉象龍暴殄天物安得爾同于人無害所欲  
易充暴露形體告人以忠又多膏油以助女工江湖下  
貧機杼以農鳥鵲知風商羊識雨大厦之下風雨何苦  
豈知舟航方在積險以爾占天蓍蔡之驗古之報祭不  
遺微蟲孰揚爾烈登薦蜡宮世不爾好復惟爾惡我作  
此歌為昭其故

堤下

堤下人家喧笑語高揭青帘椎瓦鼓黃流滾滾經簷甍  
一任征夫作舩苦綠榆覆水平如杯前灣旋放水頭來  
深如怒虎著舩底玉石磊砢相喧逐黃河雖斷隨渠急  
舟楫舒遲行旋澀獨上平堤望遠天衣裘已畏西風入

汴河

滎渠斜與昆河接河遠渠慳幾可涉狂霖一漲高十尋  
迅瀉東來比三峽崩騰下與淮泗會清泚亦容伊雒難  
橫空九闕真垂虹怒捲千艘如敗葉祇堪平地看洶湧

何事乘危理舟楫共夫鵝鶴行天上遙與谷中相應答  
但憂心手一乖迂巨舶高檣兩摧折而余進退久安命  
揭厲以望初不懾妻孥亦已慣江湖笑語猶如泛山陘  
鳴弓擊柝警夜盜掘茹撈鰕佐晨饁時登絕逕步榆柳  
或面荒陂看鳬鴨我生東南趣向野揮弄清溪看苔雪  
枕流漱石真所便履濁凌險終未愜觚稜漸喜金闕近  
釜甑何憂米鹽乏渾如海客泛枯槎繚繞明河望闔闔

閣下觀峴山圖

峴山巉巖清溪濱倒影萬丈之瀟淪往歲嘗有去思吏  
熱地尤多高蹈人少年仕宦頗落魄時登絕嶺攀蒼冥  
幽花美草頗娛目斷碑刊碣還傷神曉猿夜鶴輕相別  
從此奔走十八春舊遊不復齒頰挂方知到骨俱埃塵  
麟臺昨日見圖畫醒若楚客還羈魂方嫌一幅論萬里  
秋江綠水何粼粼人心與物本無別正為利欲相埋湮  
神功妙手如喚覺滿座風月來相親騎驢徑去自可到  
猶愈浩渺西遊秦剌沽宜城醉其下夕陽倒載望冠巾

# 食冰

冬冰冽冽雖可畏夏冰皎皎人共喜休論中使押金盤  
荷葉裏來深宮裏胃煩肺涸聊一蘇任爾青蠅相趁死  
經時不壞已可憐濟物之功尚如此人言霜雪比小人  
我謂堅冰似君子

## 愧魚亭

昔聞魚可羨今見魚可愧邂逅臨池處瀟灑出塵意秋  
風八月起江湖水染紺碧霞綺疎悠然掉尾波間去須

信人生不及魚

子瞻畫枯木

寒雲行空亂春華西風凜凜空吹沙夫子抱膝若喪魄  
誰知巧思中萌芽敗毫淡墨任揮染蒼莽菌蠢移龍蛇  
略增點綴已成就止見枯木成槎枒更無丹青相掩翳  
惟有口鼻隨穿呀往年江湖飽觀翫或在山隈溪水涯  
腹中空洞夜藏魅巔頂突兀春無花徑深最宜繫畫舸  
日落時復停歸鵝蘇公早與俗子偶避世欲種東陵瓜

窺觀盡得物外趣移向紙上無毫差醉中遺落不祕惜  
往往流傳藏人家趙昌丹青最細膩直與春色爭豪華  
公今好尚何太癖曾載木車出岷巴輕肥欲與世為戒  
未許木葉勝枯槎萬物流形若沍露百歲俄驚眼如車  
樹猶如此不長久人以何者堪矜誇悠悠坐見死生境  
但隨天機無損加却笑金城對宮柳沍然流涕空咨嗟

高樓行

天悠悠雲幕幕半夜微聞奏笙笛爛彩蹙飛仙鵲雛戢

其翼高樓百尋臨大途東臨紫垣望青都中山黃封酒  
百壺五陵年少來歡娛夷門帝家盛遊樂奔走環觀溢  
城郭如今豪吏橫索錢縱飲誰愁家寂寞

平陽歎

壞雲如山壓齊壘六軍顏色如灰死高郎元自解琵琶  
萬歲無愁作天子伯升何曾上青天濺血遺痕芳草間  
長城萬里自推仆駿馬只馱馮小憐姦臣百計為蝨賊  
不但妖娥解傾國熊羆哮鬪蹙平陽馮妃對鏡嬌櫛妝

死生契濶不相棄雙雙刎頸長安市

歸舍吟

長堤夾天溝浩蕩東南流上有騎馬客枯髯清兩眸馬  
後無飛蓋馬前無鳴騶進無趨趨謁退無輕俠遊攜金  
入市賣十鋪不一售包裹却歸舍置之牀一頭半夜光  
滿屋潛知是精繆貴物莫賤貨不如深巷收一旦遇知  
者堆斗價可求寄謝路傍子神珠難闇投

龜石

平川洶洶經南國足練橫拖半天碧洪濶巨浪之中央  
忽見顏嵬太古石此石由來幾許時混元一氣初開闢  
神功割破混沌胎劃落半空隨霹靂非龜非鼈不可辨  
有若神龜見蹤跡精剛不待媧皇鍊渾朴寧從巨靈擘  
我知神物本天性推移運轉非人力當時大禹走天下  
驅至九江為納錫萬牛攢車載不動鐵軸崢嶸自堆積  
秦皇鞭山移四海怒視不能移咫尺至今獨立猶驚人  
地志山經不能測千靈萬狀誰復知一片堅頑粗可識

昂頭突出翠濤中  
跪足橫蹠九泉脉  
勁毅縱橫竇穴穿  
當心一搭莓苔黑  
淵潛不見曳尾狀  
日燦猶驚負圖色  
青髯剝落向何處  
秋草綏綏神露滴  
勁健曾支玉女牀  
爛斑似點垂龍額  
漁翁未網先自駭  
靈蓍欲伏安可得  
龜鼈縮首不敢近  
蝦蟇巡行夜戰惕  
歲冬大寒百聖伏  
圜勁有勢無歌側  
風磨霜鍊無日休  
髮髯皺痕成兆拆  
負才不免剗腸累  
至珍惟藉天公惜  
灼以炎皇之火精  
釁以少昊之金液  
神鑽鬼卜不見形  
陰陽造化無遺策

大哉龜者物之精歲久已化為真形有時月黑無人夜  
繞岸光芒芒自生下駭深潭怪蜃窟上應中天玄武星  
萬象森森下相向來決吉凶真偽情姦狐妖鼠已破膽  
山魃野魅見亦驚波神吞氣不敢喘四面長漪鋪席平  
吾聞溪老記往歲半夜風雨來冥冥剗然曳轉大潭左  
百里震驚如雷霆問憎摧折雖萬狀崔嵬孤高終自靈  
吁哉天地至奇物何為流落於江城銅馬猶聞標漢殿  
神羊昔亦馴堯庭便當推置玉堂上古貌岌岌無歌傾

姦臣猾豎作狐媚見之賴面先吞聲  
山荒水旱必可卜倉卒變怪皆先明  
闕喪魄萬里外慙縮不敢窺天兵  
龜乎龜乎用不用壯士與爾同死生

### 發王務

曉隨燈火背千家落盡疎星見遠霞  
一餉春聲回宿鳥半天寒色在啼鴉  
臨陂弱柳猶藏葉當路殘梅已盡花  
賴值時光正妍潤穩看風物到京華

### 發蔡州

悠悠清曉歷長陂楊柳滿塍鴈鷺池風色著人寒料峭  
日先生野暖融怡鶴歸雲海心空在鴈度湖天力已疲  
客路馳驅元不定西遊應有再來時

書事二首

路逢行客向江州勒馬荒郊為少留家事滿懷無紙寫  
好將言語付蒼頭

北來煙爨苦淒涼金甕淨躁突尾長滿筐香粳無處用  
郵亭一飽待枕櫛

和竹元珍夜雨

帝城塵土熱如湯，喜有殘宵雨送涼。  
旅枕夢雲縈宋玉，空階詩思感何郎。  
香迷舊幙煙初斷，燈倚輕寒焰不長。  
明日御溝應更好，一番晴色弄垂楊。

旅枕

旅枕春風底，脩然一夢驚。  
漏移清禁遠，天入小窻明。  
桂玉梁園費，山椒楚客情。  
蕭條過百五，猶有賣花聲。

呈竹元珍

一室蕭然傍禁城  
塵埃不到旅懷清  
水流紅片知花落  
雨浥蒼苔見筍生  
感物已憐春寂寞  
辭家倍覺歲崢嶸  
知君亦有淹留歎  
歸夢西隨杜宇聲

經父云自到京止得一書頗懷憂想因寄

萬事崢嶸不自由  
年來書信最綢繆  
鴈飛玉塞無多地  
人望神都正倚樓  
祗恐邊風多浩蕩  
故令音驛每遲留  
何如款段相隨出  
鄉曲長為馬少遊

贈程瓌

識盡公卿更食貧蒼髯瘦骨走京塵高談亦與時多忤  
屢中方知術有神前會渺茫渾不記遠遊蕭索復相親  
疑公別得壺中趣回首人間二十春

題報慈寺花藥園

少時隨衆蹂京塵曾倚朱欄看晚春二十年間頭半白  
方知花木解磨人

羅港

八節灘頭駐馬蹄淙淙流水日沉西歲時久已成陳迹

風景全然似此溪  
蘭棹倚洲人競過  
藍輿索筆我閒題  
桃源仙境今何在  
懊惱嬌鶯向暮啼

過馬鞍山

足歷黃州百疊山  
更無平地只岡巒  
物皆枯槁非人世  
石最崔嵬是馬鞍  
畏日流金紅艷艷  
亂沙堆雪白漫漫  
崎嶇出盡聊休息  
喜有松聲六月寒

君表自西林還城中以詩為別

天上優遊侍從臣  
還鄉晝錦坐生春  
不矜富貴知餘事

同訪溪山有故人方外笑談無畛域雨餘泉石長精神  
西林路口嗟輕別善護青雲萬里身

入山三首

冠蓋成陰中路迴獨攜蓮社道人來千巖萬壑初相識  
分付晴嵐面面開

路出西林興倍長輕衫短蓋入秋陽層崖蔽日多清影  
深谷迷人有異香訪古不辭穿絕磴參禪直為遍諸方  
此身似是遼東鶴偶逐飛雲到故鄉

十歲不出還可嗟  
經旬遍走梵王家  
羣山拍手向人笑  
方朔今來何晚耶

黃州

客路深秋一轉蓬  
淮天牢落此將窮  
城開雲水蒼茫處  
人在茅簷掩映中  
對岸武昌風月近  
千年赤壁是非空  
悠悠陳迹慵開口  
謾把筠竿伴釣翁

吳章嶺作

廬山北轉是吳章  
巖草紛紛靜有香  
洞口流泉似相送

人間天上莫相忘

晚登庾樓

却從江漢望匡廬  
湓口風波日愈疎  
滿甕尚留桑落酒  
登盤今有武昌魚  
斜陽柳色明碕岸  
纖月波光濕太虛  
鸚鵡洲前弔豪士  
重將詞賦為君書

蘇子瞻雪堂

古縣東邊仄徑開  
先生曾此斲蒿萊  
鸞凰一去應不返  
花柳當年皆自栽  
畫壁蒼茫留水墨  
朱欄剝落長莓苔

鄰翁笑我來何暮  
檢點風煙興盡回

鄂州

綠柳陰陰蔽武昌  
汀洲如畫引帆檣  
一江見底自秋色  
千里無風正夕陽  
暫別勝遊渾老大  
追思前事只淒涼  
賢豪況有遺蹤在  
欲買溪山作漫郎

蕭灑堂

旅平凹處剪荆榛  
畫棟明窻學隱身  
政簡琴書聊度日  
地閒花木為留春  
一盃濁酒迷今古  
五字清吟泣鬼神

暫伴登臨對佳景  
衣襟渾覺減埃塵

### 湖山亭

縣山峻絕有新亭  
公退時來看洞庭  
天外微茫二湖合  
波心縹渺一峰青  
非時爽氣生雲雨  
永夜寒光浸斗星  
千古登臨增健筆  
投文猶可弔湘靈

### 五鼓乘風過洞庭湖日高已至廟下

半掩船篷天淡明  
飛帆已背岳陽城  
飄然一葉乘空度  
卧聽銀潢瀉月聲

南津滌潯夜風微投曉湖靈更發機想像虛空聞帝樂  
逡巡波浪匝天圍三湘路指平蕪轉兩舸帆爭白鳥飛  
却上叢祠薦牲酒荆雲隱隱尚朝暉

城上亭上

更無人跡逐攀躋廬岳烏藤手自攜滄海誰論六月息  
茂林今得一枝棲幽芳滿徑春難老翠樾連雲日易西  
況有北郊宜曠望公餘聊此發醯雞

輶車館

野濶天長入望青眼中虛豁到鴻冥偶因楚俗來同樂  
下視湘江笑獨醒風緊水光時蹙練日斜山影半迴屏  
扁舟過此方年少老矣重來鬢漸星

湘潭

祿仕飄然寄楚鄉才能苦短志方強已栽綠柳如彭澤  
況有黃金似櫟陽風颭湘波天影動雲來衡岳雨聲長  
尚疑卑濕難安處更起西邊百尺堂

湘潭近有古發金坑者余作堂於廳

西謂之月堂

九月二十二日西館雨中作

西館蕭然擁罽裘，渾無桃李似潘侯。  
路多綠竹遮欄雨，池有殘荷掩映秋。  
蠻獠謳歌逢樂歲，江湖風景憶扁舟。  
衣冠到底為身累，祇慕逍遙寄一丘。

寄范清老

日挂西南有薄輝，稜稜霜氣犯寒衣。  
不愁斗柄隨春轉，祇怕梅花學雪飛。  
湘浦波光頻送別，溫城山色屢思歸。  
高人只在南坡住，好共留錢買釣磯。

湘上

南歸曾泛碧湘舫  
擊汰臨流似浩然  
平野幾枯殘歲草  
綠波猶浸舊時天  
簿書倥傯嗟巖邑  
樽酒歡娛憶少年  
尺水片雲今我有  
亦當風月為留連

寄劉貢甫

秀水先生今傑才  
崎嶇山徑滯蓬萊  
飛牋岳麓吟秋草  
把酒襄陽醉臘梅  
東郡政聲無豈弟  
南樓風月且徘徊  
朝廷選用多英俊  
早晚劉郎即到來

自寶豐倉歸

岳雲成凍把春寒十里崎嶇倦往還  
馬上朔風回繫帶雪  
中微酒見開顏含黃欲坼江邊柳  
蘸綠相重水上山拋  
掉一官如糞壤好隨魚舸此中間

與陳董二君相會于真州經月甚樂詩寄董陳君  
兼感存沒

平生交友半成塵想見當年樂會文  
別淚茫茫添海水  
愁懷黯黯塞江雲青衫脫去誰同老  
白首追隨尚有君

官暇更將碁子學他時籌局當功勲

讀王逢原文奇其才擇甚精錄一編

人喜相知自昔然况君埋玉未多年雄文一讀千行淚  
青眼相期萬古傳已掇條枚收美實更披沙石貯清泉  
東齋倒掩無人語火煖燈明手自編

次韻和鄧慎思謝劉明復畫道林秋景

鈴齋清話未更端一掃禪林景趣完縹渺已裝新殿塔  
縈紆仍引外峰巒冷風有意生空濶密雪無聲下廣寒

平昔所遊今在眼淒涼疑是夢中看

和李時發春日見寄

聞道重湖路未通悠然身在碧湘中  
崎嶇水國猶千里牢落春花已半空  
江浪濺寒侵小睡岳雲篩雨響疎蓬  
君詩亦說清幽趣便覺年來氣味同

登湘陰北寺江亭

古縣我新剎孤亭占上頭  
野苔侵坐綠江水帶天流絲  
斷湘靈瑟蘋荒帝子洲  
人寰真似夢頃刻已千秋

辭二妃廟

盤空鳥鵲噪叢祠  
船上行人半起時  
殘月濛濛傾島嶼  
南風嫋嫋透旌旗  
開帆便欲日千里  
別廟仍澆酒一卮  
岸芷洲蘭俱可薦  
新聲翻入九歌詞

過洞庭

朝來四境宿雲披  
漸放扁舟入渺瀰  
漠漠衣襟凌水霧  
悠悠簾幕挂天絲  
波平自喜看書穩  
風軟翻愁出險遲  
今夜君山興不淺  
登臨應及月明時

登涵暉亭

常時洲島隔波瀾故覓君山直上看  
罨畫園林春減色  
水晶宮闕晝添寒  
州城斜引羣峰小  
湖面平吞數驛寬  
坐久西風響喬木  
扁舟思到武陵灘

登齊山

路出南堤思灑然  
烏藤點點破苔圓  
山腰仄塞元無路  
洞底虛無別有天  
六月清風醒客醉  
千叢怪石伴僧禪  
近人登覽方為貴  
從此匡廬不直錢

銅陵縣端午日寄兄弟

柳浦移舟帶雨行，奔波南北是平生。  
忽驚佳節臨端午，還記當年客禁城。  
丹杏飮盤深簇火，碧醪傾盞釀堆飴。  
菖蒲角粽俱如舊，何事樽前醉不成。

寄經甫

南北飄然各轉蓬，佳辰無路笑言同。  
銅壺縣冷更微雨，白鵲樓高來遠風。  
粽剝雪膚明席上，酒傾玉骨映盃中。  
區區羈旅無歡笑，遙想華堂屢一烘。

寄季毅甫

清涼寺

白寺荒灣略艤舟攜筇來作上方遊何年巧匠開山骨  
自古精兵聚石頭故壘無人空向久高堂問話凜生秋  
雲庵快望窮千里一借澄江洗客憂

繫舟長蘆作

夜泊長蘆星滿川晚來吳楚氣昏然雲雷相會還成雨  
江海交流獨艤舩廢室與人喧白浪荒村何處起青煙  
文書滿眼從拋棄却倚蒲團學坐禪

宮詞二首

十頃西池碧近天春深調馬教龍舩至尊勤政歡嬉少  
企望鑾輿又七年

雲霧貌香錦繡惟千官重列序賓儀欲知湛露零蕭處  
盡在天杯側勸時

草石寺

寺有滯間題壁  
權德輿晏坐記

高士去已久餘踪猶可知竹陰侵晏坐山影在平池塵  
蝕參軍墨苔侵相國碑漫尋瀟灑趣俯仰愜心期

惜竹

并引

東齋有竹數竿翠蔚可喜其旁衆笋附生浸益深茂  
最後出者尤若竒特無不應意解擇未盡而為老兵  
手折之悲夫以干雲蔽日之勢而摧于牕戶之下以  
凌霜冒雪之姿而失於俄頃之間環步往來悽愴良  
久不能忘情既而自譬解以為陰陽之化育天地所  
覆載孰非假妄自四肢百骸外至耳目所接諸物若  
器皿若室屋親愛之聚輿馬之隨孰能固守而終全  
之其會合出於暫然至於離散壞熄此理終在何獨

一竹可傷而介然于懷乎乃頗能自遣而宥役兵之  
罪然復一到其下則初心還起不能平也余真大惑  
者歟抑物之難得而可愛當然者也姑置其說寓之  
以詩

老蘚墻陰夕照間何人折我翠琅玕即之綠葉隨塵化  
猶有低枝帶露殘不放雲梢侵霰雪因嗟世故足波瀾  
故園未乏實當品十頃繁陰六月寒

贈夢符朝議

玉溪在夢符宅後

人笑公衣不浣濯我憚公心霜雪明青山仕宦有真炁  
白首鄉閭無惡聲相逢回首又再歲暫去還來觀太平  
何事南歸太果決蕭然遠作玉溪生

送望聖監南嶽廟

還鄉同赴紫宸朝笑語從容慰寂寥白髮侵陵今滿鑑  
青春羈旅舊連鑣易江小隱西園在湘浦新除道路遙  
老境不堪論契濶東風官柳亂堤橋

遊凝祥池同晁無咎作

平時念江國此地愜幽情  
楊柳繁無路鳬鷺遠有聲  
郊原斜日下襟袂好風生  
把酒須拚醉還家下隔城

遊洪福寺

清晨戒童僕馬匹出皇州  
欲探逍遙趣因成爛熳遊  
藤蘿回晝暝雲雨送春愁  
傍近緋桃塢尋春亦少留

遊州南同文潛作

峩峩宮殿列仙居深水方圓  
氣象殊萬里舟舩會京洛  
幾人詩酒到蓬壺日斜清弄  
來幽谷風定薦紅滿綠蕪

語罷恍然真幻夢不應天色有江湖

館中桃花

蓬壺深絕鑠芳菲初見仙桃第一枝  
天近自應風景別春長莫恨化工遲  
相重朱戶人稀到半掩香苞蝶未知  
想像江南今盛發亦經頻雨稍離披

次韻瀛倅鄧慎思見寄

官是麟臺却佐州蓬瀛俱稱列仙遊  
憶分曉色趨天闕想對春風倚郡樓  
書付塞鴻應易到人如隴水正分流

江湖未有歸耕處何日相逢說旅愁

試院書事呈子駿明叙

憶初懷詔下天街紅燭相隨御史來  
場屋喜遵新定格  
朝廷思見已成材  
誅鋤險異歸平坦  
洗濯英華出草萊  
文藻諸生皆足用  
更期儒行比騫回

館中夏日

珍簾舒明玉涼牕納碧天  
殿樓傳遠鼓宮井取深泉  
竹籜風頻脫榴房晚更鮮  
却驚非故國五月未聞蟬

直舍新闢西牕二首

推倒西牆平日功，暑天饒作一牕風。  
人間豈有炎涼隔，只在施為向背中。

幾歲榴花蔽曲隈，繁陰初逼坐中來。  
西鄰小檻如圖畫，偷入簾帷次第開。

送芸老通判

御史連章乞此行，制書優遣副專城。  
京都豈乏翱翔處，忠義先期去就明。  
祖帳盃盤留晚色，關山草木動秋聲。

西州莫作經年計早晚君王召賈生

蛤蜊

去年曾賦蛤蜊篇旅館霜高月正圓  
舊舍朋從今好在新時節物故依然  
棲身未厭泥沙穩爽口還充鼎俎鮮  
適意四方無不可若思鱸膾未應賢

次韻李端叔見贈

君才瀟灑應時流久滯寧非命壓頭  
昨見河南推賈誼行聞天子召吾丘  
已無痛飲觀風味猶有新詩講報投

京洛塵沙著人甚清涼高爽憶宣州

寄會稽丞趙振道

龜峰琬琰翠成堆軒檻前當秀色開此地登臨比圖畫  
與君談笑繼樽壘傳聞佳景無時乏依舊清江不斷來  
今日關河隔千里相逢何處少徘徊

聞袁思正卒于宿州

畫舸西河載酒回東籬持菊待君來何知頃刻成千古  
不及從容共一杯羈旅夢魂難際接平生交分但悲哀

中年萬事長心惡何處愁眉得暫開

苦寒

晨風獵獵卷書堂坐愛松筠耐雪霜歲律崢嶸催暮景  
時光宛轉逼新陽金卮滿引顏雖解石火深籠焰不長  
安得仙家却寒術吸吞霞氣赤城傍

介之會徐氏家飲薄暮不歸為詩招之

金鞍駿馬照朱門樂會高張晉楚軍狂客浩歌翻白雪  
艷姬醉舞轉紅裙花光灼爍筵前錦酒韻氤氲盞上雲

爭似竹牕風月夜青燈殘茗細論文

題介之小閣

畫簾初卷碧山低面面青藍翠拂衣秋水暮天長一色  
渚鷗沙鴈或雙飛煙霞逗眼光相亂松竹敲風韻更微  
却笑屈原顛顚甚漁歌何苦淚交揮

江上

萬里長江一葉舟客心蕭索已驚秋亂霞影照山根寺  
落日光翻水面樓淺浦耀金知躍鯉前灘點雪見棲鷗

少年壯氣悲寥廓未忍滄江下釣鉤

夜歸口占示同行者

一天星月明如晝萬樹杉篁吟夏秋隱約棹歌聞別浦  
青熒漁火見孤舟身居簡冊三冬學心入滄溟萬里遊  
髣髴重陽正明日與君攜酒豫登樓

文仲清江集鈔

秋月

孤枕夜何永破窻秋已寒雨聲衝夢斷霜氣襲衣單利

劍摧鋒鏑蒼鷗縮羽翰平生衝斗氣變作淚汎瀾

次錢穆父新涼可喜

霜飈結新寒草木起餘怨翩翩前庭葉追逐已千萬斜  
陽背西壁迤邐落藤蔓安得金滿堂聊換酒家券追隨  
雙鴻鵠擺脫舊籠圈胡為汗流赭日與蠅爭飭常恐計  
不就更以詩屢勸江湖秋水高百尺風帆健何當開竹  
溪玉腕互酌獻左手持蟹螯平昔固有願

四月三十日慈孝寺山亭席上口占送子敦都運

待制赴河北

送客城南寺蕭然雲泉秋客意在萬里聊作須臾游昨夜過新雨清風滿梁州簪裳合俊彥河圖並天球古來功名人未就不甯休譬如鑿空使尚致安石榴矧今南畝祗徃徃東西流君能安輯之千倉與萬斛

將至南都途中感舊二首寄錢穆父

北風吹雪滿皇州攜手同為落魄遊霄

一作雲

漢路岐騰

萬里江湖塵土積千憂世情共逐飛蓬轉人事都如激

浪流只待清談慰愁病月明幾夜促歸舟

冉冉星霜七換年故人已上碧雲天書憑去鴈雖無便  
路出名都亦有緣秋晚樓臺風作雪雨餘碕岸柳生煙  
應煩北道開樽俎又費公庖幾萬錢

次韻穆父見戲


當年同望赭袍光萬事爭先落彩銕一別已經陵谷變  
再來不覺路岐長黃金久壓腰間重白筆纔容柱下藏  
惟願山林息枹鼓免教鷗隼嚇鴛鴦

余家近被穿窬累  
夕隣居擒盜者叫

呼達旦未嘗獲安寢也  
持此以乞憐于京尹



宋詩鈔卷十五



總校官庶吉士

臣張能照

校對官庶吉士

臣陳文樞

謄錄貢生

臣潘沛然